



食貨典第二百九十三卷

茶部藝文一

與兄子演書

晉劉琨

吾體中潰悶時仰真茶汝可信信致之

薺賦

杜毓

靈山惟岳奇產所鍾厥生薺草彌谷被岡承豐壤之滋潤受甘靈之霄降月惟初秋農功少休結偶同侶是采是求水則岷方之注挹彼清流器澤陶簡出自東隅酌之以匏取式公劉惟茲初成沫沈華浮煥如積雪煜若春敷

爲田神玉謝茶表

唐韓翃

臣某言中使至伏奉手詔兼賜臣茶一千五百串令臣分給將士以下聖慈曲被戴荷無階臣某中臣智謝理戎功慙盜寇前恩未報厚賜仍加念以炎蒸恤其暴露榮分紫笋寵降朱宮味足蠲邪助其正直香堪愈病沃以勤勞飲德相歡撫心是荷前朝饗士往典犒軍皆是循常非聞特達顧惟荷

幸忽被殊私吳主禮賢方聞置茗晉臣愛客纔有分茶豈如澤被三軍仁加十乘以欣以忭感戴無階臣無任云云

茶賦

顧況

稽天地之不平兮蘭何爲兮早菊何爲兮遲榮皇天既孕此靈物兮厚地復糅之而萌惜下國之偏多嗟上林之不至如羅玳筵展瑤席凝藻思間靈液賜名臣留上客谷鵲囀宮女嘖汎濃華漱芳津出恆品先衆珍君門九重聖壽萬春此茶上達於天子也滋飯蔬之精素攻肉食之羶膩發當暑之清吟滌通宵之昏寐杏樹桃花之深洞竹林草堂之古寺乘槎海上來飛錫雲中至此茶下被於幽人也雅曰不知我者謂我何求可憐翠澗陰中有泉流舒鐵如金之鼎越泥似玉之甌輕烟細珠靄然浮爽氣淡烟風雨秋夢裏還錢懷中贈橘雖神祕而焉求

爲武中丞謝賜新茶表

柳宗元

臣某言中使竇某至奉宣旨賜臣新茶一斤者天睠忽臨時珍俯及捧戴驚抃以喜以惶臣以無能謬司邦憲大明首出得親仰於雲霄渥澤遂行忽先霑於草木况茲靈味成自遐方照臨而甲拆惟

新煦嫗而芬芳可襲調六氣而成美扶萬壽以效珍豈可賤微膺此殊錫銜恩敢同於嘗酒滌慮方切於飲冰撫事循涯隕越無地臣不任感戴欣忭之至

代武中丞謝新茶表

二首

劉禹錫

伏以貢自外方名殊衆品效參藥石芳越椒蘭出自仙廚俯頒私室義同推食空荷於曲成責在素餐實慙於虛受臣無任云云 伏以方隅入貢采擷至珍自遠貢來以新爲貴捧而觀妙飲以滌煩顧蘭露而慙芳豈蔗漿而齊味既榮凡口倍切丹心臣無任云云

三月三日茶宴序

呂溫

三月三日上巳禊飲之日也諸子議以茶酌而代焉迺撥花砌愛庭陰清風逐人日色留興臥措青靄坐攀香枝閑花近席而未飛紅蘂拂衣而不散迺酌香沫浮素杯殷凝琥珀之色不令人醉微覺清思雖五雲仙漿無復加也座右才子南陽鄒子高陽許侯與二三子頃爲塵外之賞而曷不言詩矣

茶中雜詠序

皮日休

按周禮酒正之職辨四飲之物其三曰漿又漿人之職供王之六飲水漿醴涼醫醕入於酒府鄭司農云以水和酒也蓋當時人率以酒醴爲飲謂乎六漿酒之醕者也何得姬公製爾雅云檟苦茶卽不擷而飲之豈聖人之純於用乎亦草木之濟人取舍有時也自周以降及於國朝茶事竟陵子陸季疵言之詳矣然季疵以前稱茗飲者必渾以烹之與夫瀹蔬而啜者無異也季疵始爲經三卷由是分其源制其具教其造設其器命其煮飲之者除瘡而去癘雖疾醫之不若也其爲利也於人豈小哉余始得季疵書以爲備之矣後又獲其顧渚山記二篇其中多茶事後又太原溫從雲武威段礪之各補茶事十數節並存於方冊茶之事由周至今竟無纖遺矣昔晉杜育有荈賦季疵有茶歌余缺然於懷者謂有其具而不形於詩亦季疵之餘恨也遂爲十詠寄天隨子

茶賦

宋吳淑

卉其滌煩療渴換骨輕身茶荈之利其功若神則有渠紅薄片西山白露雲垂綠脚香浮碧乳挹此霜華却茲煩暑清文旣傳於杜育精思亦聞於陸羽若夫擷此皐盧烹茲苦茶桐君之錄尤重仙人之掌難踰豫章之嘉甘露王肅之貪酪奴待槍旗而採摘對鼎鑪以吹噓則有療彼斛瘕困茲水厄

擢彼陰林得於爛石先火而造乘雷以摘吳主之憂韋曜初沐殊恩陸納之待謝安誠彰儉德別有產於玉壘造彼金沙三等爲號五出成花早春之來賓化橫紋之出陽坡復聞瀕湖含膏之作龍安騎火之名柏巖兮鶴嶺鳩阮兮鳳亭嘉雀舌之識嫩翫蟬翼之輕盈冬芽早秀麥顆先成或重西園之價尙侔團月之形並明目而益思豈瘠氣而侵精又有蜀岡牛嶺洪雅烏程碧澗紀號紫笋爲稱陟仙厓而花墜服丹丘而翼生至於飛自獄中煎於竹裏效在不眠功存悅志或言詩爲報或以錢見遺復云葉如梔子花若薔薇輕飄浮雲之美霜筇竹簾之差唯芳茗之爲用蓋飲食之所資

通商茶法詔

歐陽修

古者山澤之利與民共之故民足於下而君裕於上國家無事刑罰以清自唐末流始有茶禁上下規利垂二百年如聞比來爲患益甚民被誅求之困日惟咨嗟官受濫惡之入歲以陳積私藏盜販犯者實繁嚴刑峻誅情所不忍使田閭不安其業商賈不通於行嗚呼若茲是於江湖間幅員數千里爲陷阱以害吾民也朕心惻然念此久矣聞遣使者往就問之而皆謹然願弛榷法歲入之課以時上官一二近臣件析其狀朕嘉覽於再猶若慊然又於歲輸裁成其數使得饒阜以相爲生剗去

禁條俾通商賈歷世之弊一旦以除著爲經常弗復更制損上益下以休吾民尙慮喜於立異之人緣而爲姦之黨妄陳奏議以惑官司必實明刑用戒狂謬布告遐邇體朕意焉

龍茶錄後序

前人

茶爲物之至精而小團又其精者錄序所謂上品龍茶者是也蓋自君謨始造而歲貢焉仁宗尤所珍惜雖輔相之臣未嘗輒賜惟南郊大禮致齋之夕中書樞密院各四人共賜一餅宮人翦金爲龍鳳花草貼其上兩府八家分割以歸不敢碾試相家藏以爲寶時有佳客出而傳玩爾至嘉祐七年親享明堂齋夕始人賜一餅余亦忝預至今藏之余自以諫官供奉仗內至登二府二十餘年纔一獲賜因君謨著錄輒附於後庶知小團自君謨始而可貴如此

南有嘉茗賦

梅堯臣

南有山原兮不鑿不營乃產嘉茗兮囂此衆氓土膏脈動兮雷始發聲萬木之氣未通兮此已吐乎纖萌一之日雀舌露掇而製之以奉乎王庭二之日鳥喙長擷而焙之以備乎公卿三之日槍旗簪擻而炕之將求乎利贏四之日嫩莖茂團而範之來充乎賦征當此時也女廢蠶織男廢農耕夜不

得息晝不得停取之由一葉而至一掬輸之若百谷之赴巨溟華夷蠻貊固日飲而無厭富貴貧賤亦時啜而不寧所以小民冒險而競鬻孰謂峻法之與嚴刑嗚呼古者聖人爲之絲枲絺綌而民始衣播之禾薺菽粟而民不饑畜之牛羊犬豕而甘脆不遺調之辛酸鹽苦而五味適宜造之酒醴而讌饗之樹之果蔬而薦羞之於茲可謂備矣何彼茗無一勝焉而競進於今之時抑非近世之人體惰不勤飽食梁肉坐以生疾藉以靈殍而消腑胃之宿陳若然則斯茗也不得不謂之無益於爾身無功於爾民也哉

述煮茶小品

葉清臣

夫渭季汾麻泉源之異稟江橘淮枳土地之或遷誠物類之有宜亦臭味之相感也若乃擷華掇秀多識草木之名激濁揚清能辨淄澠之品斯固好事之嘉尚博識之精鑒自非笑傲塵表逍遙林下樂追王濛之約不讓陸納之風其孰能與於此乎吳楚山谷間氣清地靈草木穎挺多孕茶荈爲人採拾大率右於武夷者爲白乳甲於吳興者爲紫筍產禹穴者以天章顯茂錢塘者以徑山稀至於續廬之岩雲衡之麓鴉山著於吳歛蒙頂傳於岷蜀角立差勝毛舉實繁然而天賦尤異性靡俗諳

苟制非其妙烹失於術雖先雷而甌未雨而檐蒸焙以圖造作以經而泉不香水不甘爨之揚之若
淤若滓予少得溫氏所著茶說嘗識其水泉之目有二十焉會西走巴峽經蝦蟆窟憩蕪城汲蜀岡
井東遊故郡絕揚子江留丹陽酌觀音泉過無錫斟慧山水粉槍牙旗蘇蘭薪桂且鼎且缶以飲以
歡莫不瀾氣滌慮蠲病析醒祛鄙恡之生心招神明而達觀信乎物類之宜得臭味之所感幽人之
佳尙前賢之精鑒不可及已噫紫華綠英均一水也皆忘情於庶彙或求伸於知己不然者藁薄之
莽溝瀆之流亦奚以異哉遊鹿故宮依蓮盛府一命受職再期服勞而虎丘之臧沸松江之清泚復
在在封畛居然挹注是嘗所得於鴻漸之目二十而七也昔酈道元善於水經而未嘗知茶王肅癖
於茗飲而言不及水表是二美吾無愧焉凡泉品二十列於右幅且使盡神方之四兩遂成其功代
酒限於七升無忘眞賞云南陽葉清臣述

進茶錄序

蔡襄

臣前因奏事伏蒙陛下諭臣先任福建轉運使日所進上品龍茶最爲精好臣退念草木之微首辱
陛下知鑒若處之得地則能盡其材昔陸羽茶經不第建安之品丁謂茶圖獨論採造之本至於烹

試曾未聞有臣輒條數事簡而易明勒成二篇名曰茶錄伏惟清閑之晏或賜觀採臣不勝惶懼榮幸之至謹序

葉嘉傳

蘇軾

葉嘉閩人也其先處上谷曾祖茂先養高不仕好游名山至武夷悅之遂家焉嘗曰吾植功種德不爲時採然遺香後世吾子孫必盛於中土當飲其惠矣茂先葬郝源子孫遂爲郝源民至嘉少植節操或勸之業武曰吾當爲天下英武之精一槍一旗豈吾事哉因而游見陸先生先生奇之爲著其行錄傳於世方漢帝嗜閱經史時建安人爲謁者侍上上讀其行錄而善之曰吾獨不得與此人同時哉曰臣邑人葉嘉風味恬淡清白可愛頗負其名有濟世之才雖羽知猶未詳也上驚敕建安太守召嘉給傳遣詣京師郡守始令採訪嘉所在命齋書示之嘉未就遣使臣督促郡守曰葉先生方閉門制作研味經史志圖挺立必不屑進未可促之親至山中爲之勸駕始行登車遇相者揖之曰先生容質異常矯然有龍鳳之姿後當大貴嘉以皂囊上封事天子見之曰吾久飫卿名但未知其實耳我其試哉因顧謂侍臣曰視嘉容貌如鐵資質剛勁難以遽用必撻提頓挫之乃可遂以言恐

嘉曰礎斧在前鼎鑊在後將以烹子子視之如何嘉勃然吐氣曰臣山藪猥士幸惟陛下採擇至此可以利主雖粉身碎骨臣不辭也上笑命以名曹處之又加樞要之務焉因誠小黃門監之有頃報曰嘉之所爲猶若粗疎然上曰吾知其才第以獨學未經師耳嘉爲之屑屑就師頃刻就事已精熟矣上乃勅御史歐陽高金紫光祿大夫鄭當時甘泉侯陳平三人與之同事歐陽嫉嘉初進有寵曰吾屬且爲之下矣計欲傾之會天子御延英促召四人歐但熱中而已當時以足擊嘉而平亦以口侵陵之嘉雖見侮爲之起立顏色不變歐陽悔曰陛下以葉嘉見托吾輩亦不可忽之也因同見帝陽稱嘉美而陰以輕浮訾之嘉亦訴於上上爲責歐陽憐嘉視其顏色久之曰葉嘉眞清白之士也其氣飄然若浮雲矣遂引而宴之少選間上鼓舌欣然曰始吾見嘉未甚好也久味之殊令人愛朕之精魄不覺灑然而醒書曰啟乃心沃朕心嘉之謂也於是封嘉爲鉅合侯位尙書曰尙書朕喉舌之任也由是寵愛日加朝廷賓客遇會宴享未始不推於嘉上日引對至於再三後因侍宴苑中上飲踰度嘉輒苦諫上不悅曰卿司朕喉舌而以苦辭逆我我豈堪哉遂唾之命左右仆於地嘉正色曰陛下必欲甘辭利口然後愛耶臣言雖苦久則有效陛下亦嘗試之豈不知乎上顧左右曰始吾

言嘉剛勁難用今果見矣因含容之然亦以是疎嘉嘉既不得志退去閩中既而曰吾末如之何也已矣上以不見嘉月餘勞於萬幾神薊思困頗思嘉因命召至喜甚以手撫嘉曰吾渴見卿久也遂恩遇如故上方欲以兵革爲事而大司農奏計國用不足上深患之以問嘉嘉爲進三策其一曰權天下之利山海之資一切籍於縣官行之一年財用豐贍上大悅兵興有功而還上利其財故權法不罷管山海之利自嘉始也居一年嘉告老上曰鉅合侯其忠可謂盡矣遂得爵其子又令郡守擇其宗支之良者每歲貢焉嘉子二人長曰搏有父風襲爵次曰挺抱黃白之術比於搏其志尤淡泊也嘗散其資拯鄉閭之困人皆德之故鄉人以春伐鼓大會山中求之以爲常贊曰今葉氏散居天下皆不喜城邑惟樂山居氏於閩中者蓋嘉之苗裔也天下葉氏雖夥然風味德馨爲世所貴皆不及閩閩之居者又多而郝源之族爲甲嘉以布衣遇天子爵徹侯位八座可謂榮矣然其正色苦諫竭力許國不爲身計蓋有以取之夫先王用於國有節取於民有制至於山林川澤之利一切與民嘉爲策以權之雖救一時之急非先王之舉也君子譏之或云管山海之利始於鹽鐵丞孔僅桑弘羊之謀也嘉之策未行於時至唐趙贊始舉而用之

煎茶賦

黃庭堅

洶洶乎如澗松之發清吹皓皓乎如春空之行白雲賓主欲眠而同味水茗相投而不渾苦口利病解膠滌昏未嘗一日不放箸而策茗枕之勲者也余嘗爲嗣直瀾茗因錄其滌煩破睡之功爲之甲乙建谿如割雙井如遽日鑄如縵其餘苦則辛螯甘則底滯嘔酸寒胃令人失眠亦未足與議或曰無甚高論敢問其次涪翁曰味江之羅山巖道之蒙頂黔陽之都濡高株瀘川之納溪梅嶺夷陵之壓錨臨邛之火井不得已而去於三則六者亦可酌免褐之甌瀾魚眼之鼎者也或者又曰寒中瘠氣莫甚於茶或濟之鹽勾賊破家滑竅走水又況鷄蘇之與胡麻涪翁於是酌歧雷之醪醴參伊聖之湯液斲附子如博投以熬葛仙之聖去穀而用鹽去橘而用薑不奪茗味而佐以草石之良所以固太倉而堅作彊於是有胡桃松實菴摩鴨脚軟賀摩蕪水蘇甘菊旣加臭味亦厚賓客前四後四各用其一少則美多則惡發揮其精神又益於咀嚼蓋大匠無可棄之材太平非一士之略厥初貪味雋永速化湯餅乃至中夜不眠耿耿旣作溫齊殊可屢敵如以六經濟三尺法雖有除治與人安樂賓至則煎去則就榻不游軒后之華胥則化莊周之胡蝶

茶經序

陳師道

陸羽茶經家傳一卷畢氏王氏書三卷張氏書四卷內外書十有一卷其文繁簡不同王畢氏書繁雜意其舊文張氏書簡明與家書合而多脫誤家書近古可考正月七之事其下亡乃合三書以成之錄爲二篇藏於家夫茶之著書自羽始其用於世亦自羽始羽誠有功於茶者也上自宮省下迨邑里外及夷戎蠻狄賓祀燕享預陳於前山澤以成市商賈以起家又有功於人者也可謂智矣經曰茶之否臧存之口訣則書之所載猶其蘊也夫茶之爲藝下矣至其精微書有不盡況天下之至理而欲求之文字紙墨之間其有得乎昔者先王因人而教同欲而治凡有益於人者皆不廢也世人之說曰先王詩書道德而已此乃世外執方之論枯槁自守之行不可羣天下而居也史稱羽持具飲李季卿季卿不爲賓主又著論以毀之夫藝者君子有之德成而後及所以同於民也不務本而趨末故業成而下也學者謹之

鬪茶記

唐庚

政和二年三月壬戌二三君子相與鬪茶於寄傲齋予爲取龍塘水烹之而第其品以某爲上某次

之某閩人其所齋宜尤高而又次之然大較皆精絕蓋嘗以爲天下之物有宜得而不得不宜得而得之者富貴有力之人或有所不能致而貧賤窮厄流離遷徙之中或偶然獲焉所謂尺有所短寸有所長良不虛也唐相李衛公好飲惠山泉置驛傳送不遠數千里而近世歐陽少師作龍茶錄序稱嘉祐七年親享明堂致齋之夕始以小團分賜二府人給一餅不敢碾試至今藏之時熙寧元年也吾聞茶不問團鑄要之貴新水不問江井要之貴活千里致水真僞固不可知就令識真已非活水自嘉祐七年壬寅至熙寧元年戊申首尾七年更閱三朝而賜茶猶在此豈復有茶也哉今吾提瓶支龍塘無數十步此水宜茶昔人以爲不減清遠峽而海道趨建安不數日可至故每歲新茶不過三日至矣罪戾之餘上寬不誅得與諸公從容談笑於此汲泉煮茗取一時之適雖在田野孰與烹數千里之泉澆七年之賜茗也哉此非吾君之力歟夫耕鑿食息終日蒙福而不知爲之者直愚民耳豈我輩謂即是宜有所紀述以無忘在上者之澤云

謝傳尙書惠茶啟

楊萬里

達餉新茗當自攜大瓢走汲溪泉東澗底之散薪燃折脚之石鼎烹玉塵吸香乳以享天上故人之

意媿無胷中之書傳但一味攪破菜園耳

煮茶夢記

元楊維禎

鐵龍道人臥石牀移二更月微明及紙帳梅影亦及半窗鶴孤立不鳴命小芸童汲白蓮泉燃檟湘竹授以凌霄芽爲飲供道人乃遊心太虛雍雍涼涼若鴻濛若皇芒會天地之未生適陰陽之若亡恍兮不知入夢遂坐清真銀暉之堂堂上香雲簾拂地中著紫桂楊綠瑤几看太初易一集集內悉星斗文煥煜燦熠金流玉錯莫別爻畫若烟雲日月交麗乎中天歟玉露涼月冷如冰入齒者易刻因作太虛吟吟曰道無形兮兆無聲妙無心兮一以貞百象斯融兮太虛以清歌已光颿起林末激華氛郁郁霏霏絢爛淫艷乃有扈綠衣若仙子者從容來謁云名淡香小字綠花乃捧太元盃酌太清神明之醴以壽予侑以詞曰心不行神不行無而爲萬化清壽畢紆徐而退復令小玉環侍筆牘遂書歌遺之曰道可受兮不可傳天無形兮四時以言妙乎天兮天天之先天天之先復何仙移問白雲微消綠衣化煙月反明予內問予亦悟矣遂冥神合元月光尙隱隱於梅花間小芸呼曰凌霄芽熟矣

茶法

明楊士奇

應天府批驗茶引所直隸常州府宜興縣張渚批驗茶引所浙江杭州府批驗茶引所節次關去茶引退引累催不繳其故蓋因批驗所不置簿籍附寫茶商姓名貫址或不照茶商路引聽其冒名開報或將引由成千成萬賣與嗜利之徒齎赴產茶地方轉賣與人如此欲得的確名籍追繳引難矣況茶貨出山經過官司既不從公盤詰又不依例批驗縱有夾帶斤重多是受財賣放彼何畏憚而不停藏舊引影射私茶哉又如南直隸常州府池州府徽州府浙江湖州府嚴州府衢州府紹興府江西南昌府饒州府南康府九江府吉安府湖廣武昌府寶慶府長沙府荊州府四川成都府保慶府夔州府嘉定州瀘州雅州等處俱係產茶地方相去前項三批驗所遠者數千里近亦不下數百里若照引內條例聽茶商徑赴產茶府州納課買引照茶於人爲便理必樂從誰肯不買引由公犯茶禁令却令茶商皆來此三所買引路途寫遠往返不便欲其一遵依不作前弊亦難矣況批驗引由與之截角及搜驗有無夾帶乃批驗茶引所之職所退引該與截角今照前項三所却管賣引不行批驗名實不稱有乖職掌合無請給聖旨榜文通行天下曉諭今後園戶賣茶及茶商興販茶